

**CACHET APTEEK**  
**PLUS**  
 U Plus Apteek  
**TOMSTRAAT 92**  
**Tel. 4201**  
 Groot genoeg om u te dien, klein genoeg om u te ken

die **WAPAD**  
 IN U LIG SIEN ONS DIE LIG  
 ASPU  
 AMPTELIKE STUDENTEKOERANT VAN DIE P.U. vir C.H.O.  
 JAARGANG XXXII NOMMVER 5 25 MEI 1977

**PUKKE!**  
 Vir u kleurbaadjies en sportbenodigdhede:  
**Johan Claassen Broers**

# AFRIKAANSE EN ENGELSE STUDENTE BEWEEG NADER AAN MEKAAR

Deur John Leyden

Tydens die afgelope Studenteraadskonferensie wat op 25 April by RAU gehou is, was daar besluite veranderings tussen die Afrikaanse en Engelse studente, in die sin dat daar groter vertroue en samewerking tussen die studente ontstaan het. Alhoewel Swart- en Kleurling-studente genooi is, was hulle nie in staat om die konferensie by te woon nie.

Beide die politiese en apolitiese kante van die onderwerp studentediens is op die konferensie bespreek. Die Engelse studente was van mening dat die gemeenskap verander kan word deur welsyn as die dryfveer. Hulle het met ander woorde humanistiese redes aangevoer. Die Afrikaanse studente het meer van die standpunt van naasteliefde uitgegaan waar die Christelike grondslag en roeping teenoor die medemens ter sprake was. Dit was egter duidelik dat daar nie plek is vir negatiewe patrianistiese nie.



Theuns Eloff  
 Foto: Fotokuns

## Bande met Engeland

Nick Haysom, voorsitter van Ikeys en president van Nusas het gepraat van die "white liberal university" wat vandag bestaan. Verder moet die Engelse student besef dat hy nie meer in Moeder Engeland is nie.

maar deel van Afrika is. Hy het ook gesê dat die universiteit van vandag gekommersialiseer is en dat die praktyk voorskryf wat die student moet leer. Die universiteit is dus 'n masjien wat

net bekwame mense op die samelewing en industrie se voorskryf lewer.

Theuns Eloff, voorsitter van die P.U. vir C.H.O. se Studenteraad sien die universiteit egter nie as 'n voorbeeld wat geïsoleer en onaangeraak moet wees nie, daar is besluite raakpunte met die samelewing. Belangrik is dat die Universiteit nie slegs in diens van die gemeenskap moet wees nie, maar primêr in diens van die wetenskap.

## Neutraal

Wat is neutraal en wat is wetenskap? Oor hierdie punt het die Puk en die Engelse studente saamgestem. Hulle het gesê dat jy nie neutraal kan wees in die taak van die universiteit nie.

'n Voorbeeld om die verskil tussen die Puk en die Engelse student aan die eenkant en die ander Afrikaanse studente duidelik te stel, kan Tukkies se argument aangehaal word. Hulle sê egter dat die keuse van 'n studieveld nie 'n wetenskaplike vraag is nie, maar neutraal, terwyl die Puk en die meeste Engelse studente saamstem dat dit wel op wetenskapsvlak lê.

Daar was wel 'n verskil tussen die Puk-studente en die Engelse studente in die sin dat die meeste Engelse studente die universiteit slegs as 'n opvoedkundige inrigting beskou. Die vormingsaspek van die hoër opvoedkundige inrigting is deur al die universiteite beklemtoon.

## Polarisasie

In die onlangse verlede was daar 'n sterk polarisasie tussen die Afrikaanse studente en Engelse studente. Dié jaar het die prentjie aansienlik verander - moontlik omdat die Afrikaanse studente logies begin dink het en die Engelse studente meer positiewe mense as leiers gekry het. Daar was dus 'n groter spektrum van menings.

Dit het duidelik gebleek dat die Engelse studente beslissig nie almal links neig nie, alhoewel daar tydens die konferensie van tradisionalistiese - tot radikale menings was.

## Almal praat politiek

Met dié konferensie was die Afrikaanse studente beslissig meer bereid om amp- telik oor politieke sake te praat. Voorheen het hulle hul beperk tot sake rakende studentediens en studentevoordele in die sakelys.

Die feit dat daar meer oor

politiek gepraat is, het politieke misverstande tussen die Afrikaanse student en die

**LEES BINNE**

- Kuns en vermaak .. Bl. 2
- Klappe word uitgedeel .. Bl. 3
- Hoofartikel .. Bl. 4
- Deur my .. Bl. 5
- Lens .. Bl. 5
- Koshuisnuus .. Bl. 6

Engelse student uit die weg geruim. Dit wat die Engelse studente "political issues" noem, is nie noodwendig partypolitiek nie, maar meer 'n lewens- en wêreldbeskouing. Sodoende is agtergekom dat die Engelse studente meer lojaal is teenoor Suid-Afrika en sy mense as wat gedink is, en groter kontak en vertroue ontstaan het.

## Nusas

Nusas het ook meer geloofwaardig geword met hulle beleid van "Africanization", Nick Haysom, voorsitter van Nusas, het gestel dat jy deel van Afrika is en vir jou eie voortbestaan en die van ander mense moet werk. 'n Verdere inter-

pretasie van Africanization is die opheffing van "racial barriers" en die daarstelling van 'n "intergrated society".

Daar bestaan egter nog linkse verenigings op Engelse kampusse wat hulle ontstaan het uit die "ou Nusas". Op Wits bestaan die "Student African Movement", op UCT die "Student Social Democracy" en op Durban die "Student Democracy Association". Van die Engelse studente sê self dat hierdie verenigings byna ekstremisties is en moeilik om mee te kommunikeer.

In 'n onderhoud met die Wapad het Theuns Eloff gesê dat daar groot vooruitgang gemaak is op die konferensie en wel op die gebied van skakeling tussen Afrikaanse- en Engelse-studente.

# BESWARE TEEN NAWEEKTOETSE

DIE Studenteraad het sterk standpunt ingeneem teen naweektoetse nadat hoër universiteitsamp- tenare erken het dat die Senaat se besluit dat toetse Vrydae- en Saterdag-aande geskryf word 'n "vyfminuut" besluit was.

Die moontlikheid dat naweektoetse in die nabye toekoms opgehef sal word is egter baie skraal omdat die Senaat nie voor Juliemaand hul besluit in heroorweging sal kan neem nie.

Die redes wat die Senaat aangegee het vir die skryf van naweektoetse word in die verslag gegee wat deur mnre. Theo Cloete en Riaan van der Walt, albei SSR-lede vir die Akademiese Raads- portefeulje, as:

- die feit dat die PUK die kortste akademiese jaar van alle universiteite het en die toetse baie tyd in beslag neem,
- klasperiodes is heel dikwels te kort;

- die Senaat is van mening dat die studente nie gedurende naweke akademies verkeer nie, en gevolglik akademies swak presteer;
- gevolg van die "toename in akademiese werksaamhede" 'n "sesdaagse werkweek" vir die studente geregtig is;

- dat "studente van die duurste leegleërs in die land" is daar hy net 'n "geringe" is deel van sy studies betaal. Daarby in ag genome dat 43 per sent van alle eerstejaars druij; en
- studente kan nou naweke op die kampus gehou word en in 'n "positiewe studentelewe vir die naweek" betrek word. Dit verhinder ook dat studente te veel gedurende die naweke rondry in die lig van die huidige ekonomiese krisis.



Theo Cloete Voorsitter van die Akademiese Raad

Mnre. Cloete en Van der Walt sê in die verslag dat hulle probleme gehad het om samewerking van die owerhede te kry en kan daarom nie aanspraak maak daarop dat dit al die redes is nie.

Hulle noem vyftien praktiese probleme wat die studente ondervind met die skryf van naweektoetse. Van die belangrikste is die probleem dat die toetse baie gekonsentreerd is. Dit blyk dat daar in 'n sekere fakulteit van 18 Maart tot 25 Junie elke Vrydag en Saterdag toetse geskryf word.

Volgens die verslag sal studente wat huistoe wil gaan gaan, al is dit nadat die toets geskryf is. Saamryery word benadeel en dit is ook nie bevorderlik vir die huidige ekonomiese situasie nie.

B.Sc.-studente kla dat hulle Vrydae tot sesuur prakties het. Net 'n uur daarna moet hulle toets skryf.

Daar is ook te veel studente aktiwiteite en verenigings wat nadelig getref word deur naweektoetse. Hieronder word die volgende genoem: die Admissiebond, Teologika, die P.U.-koor, Thalia wat van naweekoptredes afhanklik is, die Voortrekkers en die Volkspeler-groep.

Vier aanbevelings is deur die kommissie gemaak. Dit word heelhartig deur die SSR gesteun.

Volgens die verslag is die studente baie ten gunste van semesterkursusse. So 'n leerplan, sê die verslag, sal die student dwing om dwarsdeur die jaar te werk.

Deur studente wat Julie- maand nie slaag nie te laat gaan sal baie geld gespaar word.

Die studente is van mening dat klasperiodes heeltemal genoeg tyd laat vir toetse. Toetse kan gedurende weksaande geskryf word. Daar is genoeg lokale daarvoor, sê die verslag. Dit sal ook beteken dat na-uurse en dagstudente nou saam aan dieselfde vraestel kan skryf.

As dit dan nie anders kan nie word die Senaat versoek om toe te gee dat ten minste een naweek per maand daar nie toetse geskryf word nie.

Die aanbevelings is na vernem word deur die Senaat verwerp maar die saak word deur die studenteraad met die nuwe rektor prof. Tjaart van der Walt opgeneem.

# Vergunning en Beperkings

Deur Christiena Pelser

Die Advieskomitee vir koshuise het nuwe aanbevelings vir laat- aande vir al die dameskoshuise aan die Rektor voorgelê, wat ook deur hom en die Universiteitsraad goedgekeur is. Die nuwe reël lui as volg:

Algemene laataande op Vry- dagaande vir alle dameskos- huise

1.1. Aan eerstejaardames word drie laataande per kwartaal toegeken, waarvan twee op 'n Vrydagaand geneem moet word - dit laat die eerstejaars meer ruimte gedurende die naweke, maar beperk hulle gedurende die week.

1.2. Aan tweedejaardames word 'n algemene laataand op Vrydag en twee keuse laataande per maand toege- ken.

1.3. Aan derdejaardames word 'n algemene laataand op Vrydag en een laataand per week toegelaat.

1.4. Saterdagagaand bly 'n algemene laataand.

1.5. Aan alle huiskomitee- lede en studente in hul vierde akademiese jaar word 'n algemene laataand op Vry- dag en twee laataande per week toegeken.

Daar word met dank van die dames se kant af van die nuwe reëls kennis geneem, of hoe dames?

Met baie minder dank van die Puk-massa se kant af word kennis geneem van die feit dat huisvaders aangesê is om toe te sien dat geen serenadegroep vir koffie ingenooi word nie, hetsy daar 'n huiskomiteelid by is of nie! Jammer manne, dis buite ons beheer!

Van hierdie winter af word verwarmers in die koshuise toegelaat. Daar moet streng gelet word dat slegs een asbesverwarmer per kamer toegelaat word. Die verwarmers sal hopelik 'n verbeterende invloed op die akademie hê. Ons moet altyd onthou dat ons primêre doel op die Puk is om kennis te verwerf. So, komaan Pukke, rol julle moue op; skuif agter die verwarmers in en stry die genotvolle stryd om kennis na kennis.

# Kuns en Vermaak

## Spel sonder Grense

Soos almal reeds weet het die Wes-Transvaal streek die gewilde "Spel Sonder Grense" gewen. Aster het met twee van die gelukkige wenners gaan gesels en die voorreg gehad om in hulle vreugdes te deel.

## SWARTVROU MEER MODEBEWUS

"Die modebewuste vrou in Suid-Afrika is vandag die swartvrou." So sê mnr. A. Müller-Kälin, 'n Suid-Afrikaanse mode-ontwerper.

Hy was op-pad na Jan Smuts-lughawe, vanwaar hy na Europa sou vertrek, toe Die Wapad by hom uitgevind het, wat die Pukdames volgende somer gaan dra. Mnr. Müller-Kälin sê dat dit die jongmense is, wat

modebewus is. Vir die Westerse wêreld het nuwe waardes soos 'n eie motor belangriker geword. Terwyl die blanke jeug aan gebleikte jeans bly kleef, vind nuwe modes nie inslag nie, kla hy.

Volgens hom word die swartes nou eers modebewus, omdat hulle dit vir die eerste maal kan bekostig. Die jong swartvrou is sy vernaaamste klandisie.

Hy vertel verder dat strepe volgende somer nog hoogmode is, maar op 'n ander manier. Die strepe gaan geometriese patrone, reghoeke en sirkels vorm om hier en daar met blomme onderbreek te word, verduidelik hy.

"Denim is aaklig," sê hy. Dit is egter in Europa ook nog gewild. Hy hoop dat blou denim nou gaan uitsterf. Hy verraaai dat volgende somer ander kleure denim, ook met ontwerpe op, gaan bring.

Mnr. Müller-Kälin vertel dat die mense alhoemeer

terugkeer na natuurlike vesels soos kaasdoek, ongebleikte linne, kombuisdoek en katoen, wat met sy sade en al gewee is. Blykbaar gee die Suid-Afrikaanse vrou nie om om weer te stryk, ná die blaaskansie wat sintetiese stof haar gegee het nie.

Mnr. Müller-Kälin, 'n Switser van geboorte, sê dat die meeste Suid-Afrikaanse ontwerpers immigrante is. Hy skryf dit daaraan toe dat die plaaslike publiek wil hê, wat oorsee gedra word. Daarom moet die ontwerpers vinnig op die Europese modes reageer om voor te bly.

Hy was oppad na Frankfurt-Interstoff, 'n modeparade waar al die toonaangewende ontwerpers jaarliks probeer voorspel hoe hulle die nuwe seisoen moet raai. Daarvandaan gaan hy kyk wat die modehuise van Milaan, Parys, Zürich, Düsseldorf en Londen inhou.

Mnr. Müller-Kälin sê dat Suid-Afrika veral van Frankryk, Italië, Duitsland, Brittanje en Japan klere koop.

Die vier wenners by name mev. Bea Botha, mej. Rosalie de Klerk en mnr. Malan en Niewenhuizen is al vier dosente aan die Puk en wel, ook bekende persoonlikhede. Ons wil hulle dan ook hartlik gelukwens met hul pragtige oorwinning en veral met die nuwe motors.

Dawie Malan het verduidelik hoe hulle vier in aanmerking gekom het om te kan deelneem. Mnr. Ben Vorster van die Departement Sport en Ontspanning het hom, Dawie, geskakel en gevra of hy aan persone kan dink wat moontlike kandidate kan wees. Fiksheid, uithouvermoë, koördinasie en fisiese voorbereiding was 'n noodsaaklikheid. Na 'n deeglike bepeinsing is Dawie, Bea, Rosalie en Flame gevra om deel te neem.

Maar was die TV kameras nie 'n vreeslikheid nie. "n Mens slaan skoon blank", het beide Rosalie en Dawie gesê. Die vasvrae was daarom ook nie so aangenaam soos die ander items nie. Geeneen van hulle kon ook voorberei vir die vasvra nie, aangesien dit gegaan het om algemene kennis te toets. Dawie het verder vertel dat hulle geensins 'n program gehad het van die verskillende kompetisies nie. Met ander woorde, hulle het nie geweet wat volgende gaan plaasvind nie. Rosalie het dan ook gesê dit is juis die onbekendheid wat soveel spanning veroorsaak het, maar dit was lekker.

Al die deelnemers het hul sweetpakke by die Johannesburgse Televisiesentrum ontvang. Die opnames is die einde Februarie en die 23ste April gemaak. Dawie is van mening dat hulle gewen het omdat hulle van die gebalanseerde span onder almal was. Die kompetisie was straf en hulle was nooit absoluut verseker dat hulle gaan wen nie. Natal en die WP was hul sterkste teenstanders.

Beide Dawie en Rosalie is van mening dat die fietsry item die uitputtendste was. Hulle moes 12 km op 'n aflosbasis ry en wel die een bult op en die ander bult af. Rosalie vertel van haar ondervinding: "Toe ek weer sien is Pierre Spies hier langs my en albei van ons trap dat dit klap. Ek moes net kop-hou want ek wil hom wen en ek dink, Rosalie, hou jou ritme. So gesê, so gedaan en

toe ek weer sien, ry ek skoon onder Pierre uit".

"Die spangees was wonderlik onder al die spanne. 'n Mens kan nie dink wat dit beteken as selfs 'n opponerende span jou aanmoedig nie" was hulle mening. Rosalie het ook die name van die twee reserwes genoem nl. Wilna Fondse en Gerrie van Wyk wat hulle ontsettend baie aangeemoedig het.

Die hinderniswedloop was die lekkerste en nie een van die twee kon genoeg daarvoor praat nie. Dawie is van mening dat koördinasie hier ook 'n belangrike rol gespeel het.

Het hulle aan die motor gedink? Dawie het gesê nooit, behalwe by die laaste twee items. Ek het deelgeneem omdat ek dit geniet het. Rosalie sê ja, want jy werk in 'n span en jy probeer jou bes omdat jou spanmaats dalk die motor kon verbeur.

Dawie vertel dat hulle almal fiks was. Hy het net by sy daaglikse oefenprogram gehou. Hulle het moeg geword ja, maar hulle fiksheid het 'n groot rol gespeel. Hy voel verder dat die organiseerders van "Spel Sonder Grense" meer erkenning moet kry en in die besonder Jan Snyman. Die trefkrag wat die televisie gehad het, het ook baie bygedra tot die sukses van die program veral die dag op die Pilditch. Hulle het geleentheid gehad om top sportmanne en -vroue te ontmoet van wie jy baie hoor. Die ontsettende spangees onder die deelnemers was groot en dit het 'n groot indruk op hom gemaak.

Rosalie wil net vir almal sê: "Hou aan met oefen, moet nooit dink jy is fiks genoeg nie. Oefen elke dag en jy sal nooit spyt wees nie. Ons het dan elkeen 'n motor gewen".

Die sprankel van hierdie twee atlete het 'n ontsettende indruk op my gelaat en ek wens die geleentheid was daar om met Bea en Flame ook te kon gesels.

Pukke, ons sê baie hartlik geluk aan Dawie, Rosalie, Bea en Flame!

Die gelukkige wenners van Spel sonder Grense is: Vlnr: Bea Botha, Rosalie de Klerk, Flame Niewenhuizen en Dawie Malan. (Foto: Fotokuns).

## Aster kuier by Sy Edele Dr. G.J.J. van Deventer – Burgemeester van Potchefstroom

Tydens 'n baie suksesvolle besoek aan Dr. van Deventer is aan hom gevra hoe hy sy taak as Stadsraadslid sien en in besonder sy plig tov die damesstudente wat 70% van sy kiesers verteenwoordig. Dr. van Deventer antwoord soos volg:

"Wyk 2 is verskillend van ander wyke in dié sin dat Stadraadslide van ander wyke rekenskap moet gee van bv. die toestande van die padoppervlakte, sypaadjies, eiendomsbelasting, ens. en hierdie dinge is nie ter sprake in Wyk 2 nie.

Dit gaan egter hier om behoeftes wat by die kiesers mag ontstaan en wat die Raadslid se aandag moet geniet. Behoeftes van die individuele kiesers kan direk onder die aandag van hul Raadslid gebring word, maar as dit bv. 'n probleem van 'n koshuis is, is dit raadsaam om 'n brief deur die HK en via die SSR aan die Stadsklerk te rig wat sal sorg dat die saak op die sakelys van die Raad gebring sal word. 'n Afskrif van die betrokke brief moet aan die betrokke Raadslid gestuur word sodat hy as spreekbuis by die Raadsvergadering kan optree.

Dames, daar is ook twee dames Raadslide op die Stadsraad en by name Raadslide Uda Claassen en Hettie du Preez. Sou daar probleme wees wat u dink beter deur 'n dame hanteer kan word, sal ek geensins afgehaal voel indien van bg. dames gebruik maak nie. Ek sal selfs vir u 'n onderhoud met een van die dames reël.

Een akuele probleem wat wel onder my aandag is, is die tekort aan telefone in die dameskoshuise. Wat moet u nou doen? Maak 'n studie van die telefoonbenodigdhede van al die koshuise deur die HK en via die SSR. Ek, as Raadslid, sal dan poog om met 'n oorhoofse beplanning wat ek by die Posmeester gaan voorlê, almal se telefoonprobleme op dieselfde tyd op te los.

Wees in alle gevalle versaker van my steun vir enige projek wat u in die toekoms mag beplan."

## ERVARE VIOLISTE TREE OP

Die puik violiste, Annemarie Schulenburg, sal op 24 Mei en weer op die 25ste, aan 'n konsert van kamerwerke in die Nuwe Orreisaal van die Konservatorium deelneem. Sprankelende viool-, tjello- en ander kamerwerke belooft om tot 'n genotvolle aand by te dra.

By dié geleentheid sal ook die bekende Van Zyl Hough (viool), en 'n nuweling Dalena Roux (tjello), optree. Hulle word deur die bekende en talentvolle veterane, die pianiste, Pieter de Villiers en Hennie Coetzee, begelei.

Hoewel Annemarie nie as soliste optree nie sal sy as leier van die ensemble haar groot musiek-ervaring laat geld in die vertolking G.F. Händel se manjifieke en grootse Triosonate in D. Haar mede-deelnemers is Van Zyl Hough, Dalena Roux en Hennie Coetzee by die klawesimbel.

Vanaf 1963 het Annemarie haar belangrikste en vormendste onderrig van die bekende Alan Solomon van Johannesburg ontvang. Daarna (1965), rond sy haar studie af aan die Konservatorium in Pretoria met W. Mathlener as direkteur. Vanaf 1966 tot 1968 sit sy haar studie in vioolvoordrag voort aan die Musiekakademie in Keulen. Daar het sy onderrig van die bekende prof. Franz Joseph Maier ontvang.

Aan die begin van 1969 word Annemarie as dosente aan die Musiekdepartement aan die PU vir CHO aangestel. Sedert dié tyd het sy diep spore getrap, hetsy in die onderrig van leerlinge en studente of in die aanbieding van konsertvoordragte.

Dit sluit gereelde optredes in as soliste of in kamerwerke of as leier van die Konservatorium-orkes onder leiding van prof. Attie van der Walt.

Musiekmaak is Annemarie se grootste liefde. Te vore reeds het sy aan Betty Pack se ensembleklasse in Pretoria deelgeneem. Dit het die gereelde uitvoering van trio's, kwartette en selfs oktette tot gevolg gehad. Dit lei daartoe dat 'n besondere eer haar te beurt geval het,

naamlik om gekies te word as 'n vaste lid van die Suid-Afrikaanse Kamerorkes onder leiding van Alan Solomon. Hierdie orkes wat uit 9 professionele musici bestaan, konserteer gereeld en saai ook dikwels uit.

Dit het meegewerk dat talle musiekliedhebbers haar spel geniet, waardeur en daarna uitsien. Moontlik word dié kring nog verder uitgebrei met dié konsert.



# KLEURLINGE EN BLANKES MOET SAAM STREEF

Op Dinsdagaand 10 Mei het mnr. Jacobus Rabie tydens 'n vergadering van die Politiese Raad oor die plek van die Kleurling in die hedendaagse gemeenskap gepraat.

Mnr. Rabie is tans 'n onafhanklike lid vir die Verteenwoordigende Kleurling-raad. Hy was ook lid van die Erica Theronkommissie en leier van die Federale Party in die V.K.R. Hy dien tans in die Kabinetsraad. Hy het beklemtoon dat die meeste kleurlinge teen gesprek met die blanke gekant is. Hy glo egter in dialoog en wil hê die Kleurling en blanke moet 'n gemeenskaplike strewing in Suid-Afrika bymekaar bring. Daarom het hy 'n groot deel van sy toespraak aan wat die Kleurling in S.A. wil hê, gewy.

Mnr. Rabie sê dat baie dinge in die land die lewe vir die kleurling onuithoudbaar maak. Die blanke besluit vir die ander volkere. Hulle sien egter nie die knelpunte soos die ander volke dit sien nie. Hulle beskou die kleurlinge as 'n groep wat uit alle besluitnemende prosesse uitgesluit is. Sommige sien die kleurlinge as 'n volk "wat nie is nie".

Die kleurling voel verneder omdat hul in 4 sub-groepe naamlik Kleurling, Griekwa, Maleier en ander groepe verdeel word. Hul beskou hulself as deel van die Afrikanervolk en nie as 'n nasie of volk in wording nie. Daarom moet hulle ingedeel word by die politieke bestel van die land. Volgens mnr. Rabie beskou die kleurling nie die huidige wegbeweging van diskriminasie in dieselfde lig as die blanke as voldoende nie. Die vernouing van die loongaping vind ook nie plaas met die omvang soos hulle dit wil hê nie. Verder is net die Nico Malan-teater in die Kaap vir hulle oopgestel maar ander

teaters is vir hulle gesluit. Hulle mag in oop hotelle alle geriewe gebruik, maar mag net nie daar dans nie. Verder is luukse treine vir hulle oopgestel maar voorstedelike treine nie. Hy glo dat elkeen die gerief moet kry soos bepaal deur die kaartjie wat hy koop.

Mnr. Rabie beskou die stelsel van kleurling-munisipale besture as iets wat nie sal werk nie. Die regering dwing iets op hulle af wat hul nie wil hê nie. Hy glo dat daar 'n stelsel verkry moet word waar saam met die kleurling oor die kleurling gesels moet word. Die kleurling wil verteenwoordigend op alle wetgewende vlakke hê, en nie net in onbeduidende komitees nie.

Die kleurlinge het ook nie vertroue in die kabinetkomitee oor die verandering van die Westministerstelsel nie, omdat daar geen kleurling in dien nie. Die Kabinetsraad het groot verwagtinge by die Kleurling losgemaak. Die vraag is nou egter hoeveel beslissingskrag dit het, omdat dit nog nie statutêr ingestel is nie.

Mnr. Rabie voel dat diensvoorwaardes in die S.A.W. aantrekliker gemaak moet word, want dan sal daar baie meer kleurlinge wees wat vrywillig aansluit. Die kleurling wil nie uitgesluit word in die verdediging van die land nie. Hy sal graag wil sien dat die kleurling saam met die blanke opgelei word, want soldate moet mekaar in die opleiding leer ken en nie in die loopgrawe nie.

Volgens mnr. Rabie beskou die kleurling die Wet op gemengde huwelike en die Ontugwet as die toppunt

van rassisme, omdat dit die blanke se swaakheid beklemtoon om nie sy identiteit sonder wetgewing te verloor nie.

Mnr. Rabie sal graag wil sien dat alle werkaftakking opgehef word. Onderwys en ander opleidingsgeriewe moet ook oopgestel word omdat almal dieselfde geriewe nodig het. Daar moet ook wegbeweeg word van kulturele geskeidenheid in Suid-Afrika. Hy sien geen verskil in taalkultuur en lewensbeskouing tussen Afrikaner en kleurling nie. Hy sien daarenteen groot verskille in die Blanke volk onderling. Die laaste gedagte van mnr. Rabie is dat die uurglas leegloop. Almal moet titanies spook om sake reg te stel - al moet dit ook 'n Turnhalle in Suid-Afrika verg. Die Kabinetsraad kan daarvoor 'n goeie begin wees.

Die belangrikste is om nou kleurling en Indiër by wetgewende liggamme in te skakel. Die regering moet dit as hoogste prioriteit stel om die volkereverhoudingsvraagstuk in Suid-Afrika op te los.

## Klappe word uitgedeel

'n KLAP is gemik deur die Studenteraad na dosente wat swak voorbereid na hul klasse kom nadat die studente beskuldig is daarvan dat hulle akademies swak presteer.

Die gevoel van ontevreedenheid oor sommige dosente het in die verslag oor naweektoetse aan die lig gekom waarin die Senaat na bewering sou gesê het dat studente van die duurste leegleërs in die land is.

Volgens die Senaat kos die "leegleërs" die staat sowat R1½ miljoen per jaar.

In die verslag wat deur die kommissie van ondersoek na naweektoetse saamgestel is, sê die samestellers mnr. Theo Cloete en Riaan van der Walt dat studente besef dat die maatregel van naweektoetse ingestel is om die studente akademies te motiveer.

"Die studente voel egter dat die totale akademiese situasie in ag geneem moet word," sê die kommissie.

"In die lig van bogenoemde het van die studente gevoel dat sommige dosente se akademiese standaard laag is.

"Heelwat gevalle van dosente wat swak voorbereid is, min belangstelling toon in die klas of selfs oor ander onderwerpe gesels in die klas, kom voor wat nie bevorderlik is vir die akademiese atmosfeer nie. Naweektoetse los die probleem van akademiese peil, dus slegs eensydig en vir 'n klein deel op."

As gevolg hiervan kry dosente nie die samewerking van die studente nie maar skeep die dosente eerder 'n

negatiewe gevoel teenoor sy akademie.

Volgens die verslag waarmee die Studenteraad hulle ten volle vereenselwig, raak dit veral die eerstejaars.

Die kommissie het ook bevind dat daar navraag onder

die studente is hoe sommige dosente se buite-universitêre aktiwiteite hulle doseerwerk benadeel.

Geen dosente se name word in die verslag genoem nie.

## Korps kry uitnodiging na Turfloop

Mnr. Vusi Khanyile, organiseerder van die Anglikaanse studentevereniging aan die Turfloopse universiteit, het 'n uitnodiging aan Korps gestuur om 'n konferensie oor kerklike sake by te woon.

Al die verteenwoordigers van swart universiteite se kerke en al die blankes se verteenwoordigers is ook na die konferensie uitgenooi. Net sowat tien afgevaardigdes van elke universiteit sal die konferensie bywoon.

Prof. E. Botha het met mnr. Khanyile geskaker by 'n internasionale konferensie in Nairobi en toe was hy teen enige skakeling met blanke universiteite op kerklike vlak. Op die konferensie het

hy egter van standpunt verander.

Volgens mnr. Piet Fourie is dit die eerste keer dat Turfloop ons nader. Hulle sien uit na hierdie ontmoeting.

## "BATS" TREE OP

Die "Bats" tree op 18 Junie in die sentrale eetsaal op. Die voorprogram sal bestaan uit optredes van Johny Noble van Biltong en Potroastfaam, Jessica Jones en ander.

Dit sal 'n drie uur lange vertoning wees en kaartjies sal twee rand per persoon kos.

Op 28 Mei sal 'n honderd studente die kans kry om Johannesburg toe te gaan vir 'n fliek en 'n vertoning. Die studente sal die oggend ry en eers laat die aand terugkom. Die kaartjies sal ongeveer R5,00 per persoon kos. Die fliek Rockey sal die middag bygewoon word, en die vertoning The Sound of Music die aand nege uur in His Majesty's teater. Die prys sluit vervoer en beide vertonings in.

## CLOETE OOR NAWEEKTOETSE

Die Wapad het in 'n artikel van 25 Maart, berig oor die kwessie van naweektoetse. Die Wapad het aan mnr. Theo Cloete wat in opdrag van die SSR die saak ondersoek, die volgende vrae gestel.

Vraag: Wanneer word die verslag aan die Senaat voorgelê?

Antwoord: Die finale verslag sal voor 8 Junie aan die Senaat voorgelê word.

Vraag: Is die vorige verslag afgekeur?

Antwoord: Dit is nie so seer afgekeur nie, maar dit het 'n lou ontvangs gehad.

Vraag: Hoekom het dit 'n lou ontvangs gehad?

Antwoord: Die Senaat het besluit dat hulle op 8 Junie oor die saak sal vergader omdat praktiese probleme dan al ondervind kan word. Die verslag het slegs voorsiening vir praktiese probleme gemaak omdat dit voor die opstelling van die toetsroosters gedoen is.

Volgens mnr. T. Cloete het sommige van die Senaatslede aan hom gesê dat die verslag voorsien slegs probleme sonder dat daar alternatiewe gestel word.

Vraag: Hoe voel u oor die stelling wat aan u gemaak is?

Antwoord: Daar sal in die volgende verslag gepoog word om alternatiewe te gee. Vraag: Hoe gaan u alternatiewe kry?

Antwoord: Spesifieke persone wat insae het oor hierdie saak is aangestel om alternatiewe te ondersoek soos die module-, semesterstelsel, periodieke toetse en ook die komper te gebruik om

toetsdatums uit te werk.

Vraag: Wanneer voorsien u sal die huidige stelsel verander?

Antwoord: Die doel is dat dit die volgende toetssiklus sal vervang.

Vraag: Is daar enige praktiese probleme met die verslag?

Antwoord: Ja, ek soek nog inligting. Dit is vir my onmoontlik om alleen inligting in te win. Ek vra die studente om my in hierdie saak te help. Voorbeelde moet in die Akademiese Raad se posbus gegooi word of in my posbus by die SSR kantoor. As ek drie voorbeelde uit elke koshuis kry het ek ongeveer ses-tig voorbeelde en so 'n verslag kan moeilik oor die hoof gesien word. Elke voorbeeld, hoe gering ook al, kan die verslag versterk.

Vraag: Watter voorbeelde soek u?

Antwoord: Enige voorbeelde, soos derdejaars wat by tweedejaars toetsing hou omdat die dosent nie daar is nie. Waar toetse geweldig opeenvolgend is, of waar twee hoofvakke direk na mekaar geskryf word. Of selfs waar dit die studentelewe bemoeilik ens.

Vraag: Watter inligting moet by die probleem verstrekk word?

Antwoord: Behalwe die probleem self, sal ek graag

die student se naam, die vak, die dosent en die studiejaar wil hê. Alle inligting sal vertroulik wees.

Vraag: Het die SSR al oor die saak gesit?

Antwoord: Ja, die SSR het 'n sterk bewoerde mosie ingedien op hul vergadering van 18 April waar hulle 15 voor en een persoon buitestemming die saak betreur het.

## DIE STUDENT EN AKADEMIE

Die Universiteit van Kaapstad het verlede week 'n groter inspraak in akademiese sake verkry. Na aanleiding hiervan het die Wapad 'n onderhoud met mnr. Theo Cloete, voorsitter van die Akademiese Raad van die SSR gevoer.

Vraag: Het die student enige inspraak in akademiese sake?

Antwoord: Volgens my, beperkte inspraak.

Vraag: Wat bedoel u met beperkte inspraak?

Antwoord: Waar toestande in die klas, die metode van klasgee, of swak dosente ter sprake is, het die student die reg om dit onder die owerhede se aandag te bring. Die Akademiese Raad het verlede jaar 'n vertroulike verslag uitgebring oor swak doseermetodes en dosente.

Vraag: Hoe het die owerhede daarop gereageer?

Antwoord: Gunstig deurdat die vorige rektor dit as die mees demokratiesering van studente beskou het. Die Senaat het selfs 'n kommissie aangestel, maar nogtans voel ek dat toestande nie verander het nie.

Vraag: Is daar teen sulke dosente opgetree?

Antwoord: Moeilik om te bepaal omdat geen name in die verslag gebruik is nie.

Vraag: Hoekom is daar geen name in die verslag gebruik nie?

Antwoord: Die verslag het skokkende voorbeelde bevat en indien dit sou uitlek kon dit tot netelige situasies gelei het. Dit was egter op aanvraag beskikbaar.

Vraag: Wat is die kanale wat die studente moet volg?

Antwoord: Via die vakvereniging of direk met die Akademiese Raad.

Vraag: U het beweer dat die vorige verslag nie voldoende resultate gehad het nie? Wat gaan u Raad daaromtrent doen?

Antwoord: In my Raad is weer 'n kommissie aangestel wat die saak her ondersoek.

## PRO-REGE

U het volop keuse in ons groot verskeidenheid

- HANDBOEKE
- SKRYFBEHOEFTE
- EN WAT U OOKAL VAN 'N BOEKHANDELAAR VERLANG

### PRO REGE-PERS BEPERK

„die Potchefstroomse boekhandel“  
Tomstraat 86 - Potchefstroom  
Tel. 8875

# die WAPAD

## PROF. TJAART: 'N FRIS BRIES

Ons rektor prof Tjaart van der Walt het op Maandag 9 Mei die SSR toegesprek. 'n Paar van die gedagtes wat hy geopper het is dat die kanaal tussen owerheid en student moet oop. 'n Kanaal wat té lank verstop was.

Vergeet van inspraak, maar ons moet ons harte en ons koppe bymekaar sit, mekaar vertrou, het hy gesê.

Ons moenie wag dat die rektor sê doen dit of doen dat nie, of wag tot daar 'n opdrag kom nie maar eie inisiatief gebruik.

By ons Christelike Afrikaanse Universiteit moet almal deelneem.

As die rektor iets sê is dit sy mening, nie evangelie nie, het hy gesê.

Dit is welkome woorde want gesag is soos respek. Mens verdien dit. Jy kan dit nie eis nie.

Dieselfde met die reg tot kritiek, spraakvryheid en inisiatief. In ons Christelike siening van gesag en vryheid kan mens selfs totaal onvry wees omdat jy te sleg of lui is om dit wat jy het aan te gryp. Te gebruik. Nie net tot jou eie voordeel nie maar tot die voordeel van elke ander mens.

### Kommentaar

## HALLO SSR, EN DANKIE

Dit is die eerste keer in 'n lang tyd dat die studente van die Puk die gedagte kry dat die Studenteraad in hulle belang daar is.

Met die Studenteraad se besliste standpunte oor naweektoetse, kritiek teen onvoorbereide dosente en die voorgestelde toegewings ten opsigte van kleredragreëls is die Studenteraad besig om nader aan die studente te beweeg.

Vir die eerste keer in 'n paar jaar voel ons gerus oor 'n raad wat ons as studente daar gestel het. Deur hul kragdadige en besliste optrede is hulle besig om die vertroue wat deur vorige rade verloor is te herwin.

Ons glo nie dat dit nodig is om mnr. Theuns Eloff en sy Studenteraad te vertel hoe dit gedoen moet word nie want hulle is besig daarmee.

Eerder wil ons hulle bedank. In hierdie koers is ons met julle.

## REDELIKHEID EN NAWEEKTOETSE

Die Afrikaanse student en die studente van hierdie universiteit kan nog nooit daarvan beskuldig word dat hulle onredelike eise aan die owerheid stel of hulself aan militante gedrag skuldig maak nie.

Redelikheid het nog altyd geseëvier. Dit is ons wens dat dit so moet bly.

Maar dit is ook ons wens dat redelikheid met betrekking tot reëlins ten opsigte van sake wat die studenteorganisasies en verenigings ten nouste raak deur die owerheid aan die dag gelê moet word.


Die instelling van naweektoetse is blykbaar vinnig-vinnig deur die Senaat afgehandel sonder dat daar die minste oorweging aan die student se saak gegee is.

Die student wat akademies swak vaar moet gedurende die middel van die jaar padgee. Is dit nie genoeg nie? Moet ons nog verder "gestraf" word met naweektoetse?

Ons glo nie dat dit onredelik is om die Senaat te vra om die verslag van die Studenteraadskommissie in herooringing te neem nie.



## CALVIPOL OF CALVIBOSS?



## OP DIE WA-AS

MAURITZ MOOLMAN

Blykbaar is dit enigiets wat om koshuishoeke en -deure loer en net so vinnig soos 'n kakkerlak in 'n skeurtjie verdwyn om iewers in die strafkomitee se kombuis op te duik. Hulle kan jou aankla van enigiets waarvan jy in elk geval self nie hou nie en voordat jy weer dieselfde woord kan sê is jy voor die komitee.

Hulle beskuldig onskuldige mense. Hulle is gevaarlik en agterbaks. Hulle speel met vuur.

Maar wat van T-hempies sodat ons hulle kan uitken. Spierwit met kakiearmband én die voorletters CP én 'n eie DB vir die Puk. Sonder die keuse van 'n boete.

Miskien hou dit verband met die versoek aan die bestuure van sommige verenigings om 'n ogie op hulle lede se kleredrag te hou.

Om die woorde van 'n groot politikus aan te haal: "Go (directly) to hell," en do not pass Go, do not collect R200.

Ek meen, kyk net hoe maklik is spórtheurse reeds.

### Parkeermeter, sterf!

Gewoonlik word parkeermeters nie geteer en veer nie maar doodgewoon geverf. Nog altyd iets om voor dankbaar te wees.

Maar die ergste het die Sondag net na heropening gebeur, met die eerste lig. Die tweede parkeermeter op pad uit Potchefstroom uit, het aan sy nek gehang totdat hy dood, dood, dood is.

Reg voor Huis en Tuin aan die plafon. Elfuur was die lyk nog daar. 'n Grusame gesig. Vir agt maande van die

jaar samel die Bult se parkeermeter. stoisyns geld in vir die dorp. Altans, dit kon agt gewees het as hulle tradisioneel vir een maand vir hul jaarlikse "check-up" verwyder word nie. Dit kon selfs twaalf maande gewees het as die Puk nie so af en toe gesluit het nie.

Tot net voor Karnaval is die dorp nog ryk. Maar o wee. Dan kos dit R799 van die R800 wat dié meters vir die skatkis insamel om hulle weer vir die volgende geleentheid in aksie te hê. En nou dit.

Verkoop die parkeermeters. Dan is daar geen inkomste, geen uitgawe, geen teregstellings en geen frustrasies nie. Miskien kan mnr. Dippenaar van Potch inry belang stel. Ons beslis nie.

### Sleepaksies en naamlose briewe.

Daar is verskeie dames op die Puk.

Ek bedoel daar is vier soorte, om meer spesifiek te wees.

Daar is dames wat ordentlik sleep en nie nodig het om skaam te voel daarvoor nie.

Ten tweede is daar dames wat sleep en skaam voel daarvoor.

Derdens is daar dames wat nog nooit gesleep het nie

maar glad nie daarvoor sleg voel nie.

Laastens is daar die dames wat nog nooit gesleep het nie, of net 'n keer of wat én sleg voel daarvoor.

Die laaste is dié wat soms naamlose briewe aan die eerste groep stuur. Op die trant van "namens die inwoners" en "ordentlike meisies" en as dit of dat nie "end kry nie sal jy op die volgende koshuisvergadering bespreek word."

Behalwe dat dit lasterlik en afpersing is, is dit lafhartig en laakbaar. En dit geld vir al die identiteitlose reformiste.

Soos een van die inwoners van 'n dameskoshuis die volgende dag tot haar skok uitgevind het, is dit verspot maklik om die skrywer op te spoor.

Miskien moet Die Wapad dit oorweeg om 'n rubriek soos "Dr. Welman se Redelike Raad aan Reddelose Romanses" te begin. Dan kan u al die sleepers vasvat. Of hoe sê ek... eh... juffrou!

## Hit die Woord

### 'N REGTE WAARDEBEPALING

Luk. 10: 41 en 42 - Maar Jesus antwoord en sê vir haar: Martha, Martha, jy is besorg en verontrus oor baie dinge; maar een ding is nodig; en Maria het die goeie deel uitgekies wat van haar nie weg-geneem sal word nie.

Ons daaglikse doen en late word grootliks bepaal deur ons waardebeplanning. Elke student kan beswaarlik aan alle studente-aktiwiteite deelneem en gee dus sy deelname slegs aan dié waar-aan hy die meeste waarde heg. Die vraag is egter of ons waardebeplanning nog reg is, veral ook t.o.v. ons godsdienstige lewe.

Temidde van die bedrywighede vir 'n groot maaltyd het Maria tyd gemaak om aan die voete van Jesus te sit om aktief, met volle aandag, te luister na die woord van Jesus Christus. Hierteenoor vind ons Martha, die stukke en gasvrye huilsvrou. Sy het Jesus in haar huis ontvang en was baie besig om alles klaar te maak om Hom te bedien.

Vir ons lyk beide optredes so pragtig, maar Christus sien die verskil raak. Dit is 'n verskil in waardebeplanning. Maria ag die diens van Christus hoër as haar eie. 'n Diens wat alleen bestaan uit genade. Die grootste bewys hiervan is die kruis op Golgotha. Verlossing is bewerk. Versoening is gedoen. Maria het besef dat sy in haarself niks het om vir God te gee nie. Die mens staan, vanweë die sondes, tot die dood toe skuldig voor God. Maria wou dus eers ontvang en dan sou sy gee. Sy het ook inderdaad gegee toe sy Jesus se voete met die kosbare nardussalf gesalf het (Joh. 12:3). Martha het te veel waarde geheg aan die tydelike dinge, terwyl dié een ding - die Brood van die ewige lewe by haar verbygegaan het.

Ons studentelewe is oorval geprogrammeer. Ons doen en wil nog baie dinge doen. Ons het so baie dinge op ons kefstok, baie tydelike dinge waarvoor ons besorg en verontrus is. Hierteenoor is daar net een ding nl. die Woord van die Here wat bly tot in ewigheid. Alleen dit moet in my persoonlike lewe die sentrum word van my bestaan. Ek moet eers sit en luister, dan kan ek opstaan en doen. Dan sal ek ook doen wat Christus vir my sê om te doen.

"Soek eers die Koninkryk van God en sy geregtigheid, en al hierdie dinge sal vir julle bygevoeg word". (Matt. 6:33) Die hoofsaak is die koninkryk van God en sy geregtigheid. Die bysake, dit beveel God ons om in Sy almagtige Vaderhand te laat: Hy sal daarvoor sorg.

### NUWE KOMITEE

## Karnavalkomitee bekend gemaak

In die onderhoud met die Wapad het Koot van der Walt, Karnavalkomitee vir 1978 gesê dat daar gepoog sal word om voort te bou op verlede jaar met uitbreidings en veranderinge.

Moontlike nuwe items wat ingevoer gaan word is 'n motorfietstydren, fietstoer op standaardfietse, modeparades en 'n skoonheidskursus deur 'n bekende kosmetiekvervaardiger.

Die komitee bestaan uit

die volgende persone: Koot van der Walt - voorsitter, Jan-Louis du Toit - onder-voorsitter, Japie Cronjé - penningmeester, M. Labe en Annemarie Jacobs - sekretarisses. Die addisionele lede is Jan Botha, Ryk Brink en Anita du Plooy.



Tjaard Venter voorsitter van Libor Factus.

# STUDENTE DIENSBURO GAAN OP KAMPUS INGESTEL WORD

Die moontlikheid van 'n studente diensburo word op die oomblik op die kampus deur Liber Factus ondersoek. Soortgelyke diensburo's is op ander kampusse alreeds in werking en funksioneer na wense.

Tjaard Venter wat die ondersoek lei, het op die laaste SSR-vergadering verslag gedoen oor die ondersoek en

die werkwyse bekend gestel. Hierdie diensburo sal nie net 'n dokter en apteker insluit nie, maar ander departemente op die kampus ook betrek.

Departemente wat betrek sal word is Siefkunde, Opvoedkunde, Regsfakulteit, Maatskaplik en L.O.-departement. Die studente sal afsprake kan reël om dosente te spreek oor sekere probleme. 'n Permanente dokter sal 'n spreekkamer op

die kampus kry en besoeke sal gratis wees. 'n Apteek sal daargestel word waar medisyne teen kosprys plus 10% verkoop sal word.

Daar is egter praktiese probleme wat soos die houding van apteker en dokters in die dorp wat opgelos moet word. Studente wie se ouers aan 'n mediese fonds behoort, kan hulle onkoste van die spesifieke mediese fonds eis.

DEUR  
MY  
LENS

LOUW VAN BILJON

Dit is interessant om te sien watter tipe beriggewing in die onderskeie studentekoerante verskyn. 'n Mens kan duidelik 'n onderskeid tref tussen Afrikaanse en Engelse studentekoerante.

Engelse kampuskoerante is ontsettend politiek georiënteer, terwyl Afrikaanse kampuskoerante baie min stof oor politieke en aktuele aspekte bevat. Ons kan definitief by die Engelssprekendes gaan leer oor die dekking van aktuele nuus.

Is dit nie miskien hoekom die Engelse student meer uitgesproke en politiek aktief as die Afrikaanse student is nie?

'n Mens moet egter versigtig wees in watter gesindheid sulke nuus gepubliseer word. Koerante soos "Wits Student" van Wits en "Varsity" van Ikeys is heeltemal radikaal en afbrekend. In die April-uitgawe van Varsity is die volgende kommentaar oor die hou van die afgelope Kaapstadse karnaval gelewer:

"Did you know? ... that the festival Gables in Adderley-street are designed to withstand winds of 190 km/h during April? ... that 200 people couldn't withstand tear-gas grenades in Adderley street during August last year?"

Hoe bring 'n mens daardie twee stellings bymekaar uit? Verder:

"This month marks the 17th anniversary of the Sharpeville massacre, which was followed last year by the carnage in Soweto."

In "Dome" (van Durbanse Kampus van die Universiteit van Natal) is daar 'n gereelde rubriek by name van "The continuing saga of Alfred Azania." Dié Alfred van wie hier geskryf word is 'n blanke student wat hom beyyer vir "Vrede en Demokrasie" in Suid-Afrika. In die spesifieke artikel is Alfred oppad kampus toe. Terwyl hy duimgooi, sien hy 'n (vermeende) sakeman in 'n duur motor. Die artikel lui verder:

"Earlier in the morning he had slapped himself (dis nou die sakeman) with Old Spice after shave. He was given breakfast in bed by his servant. He had left his mansion in Westville to go and exploit others in the city. A ... capitalist!" (gesensor) "A pig!"

En verder: "... I've been trapped by the imperialist tentacles of the post-capitalist society. ... The degenerate bourgeoisie are

attempting to stifle the flame of revolution! I have found my role! I must fight, I must struggle for freedom!"

Sulke beriggewing is myns insiens heeltemal negatief en spreek van subjektiwiteit. Postiewe kritiek word geensins in die koerant gepubliseer nie. Dit is inderwaarheid bedekte opswepery met die doel om blanke heerskappy in die land te ondergrawe. Ek wonder of die mense verder as hul neuse dink ...

Die betrokke koerant is 'n massakommunikasiemedium wat 'n anti-regeringsgevoel propageer.

Stel dit nou teenoor kommentaar uit "Die Afrikaanse Student" van April 1977: "In die versekering van vryheid en vrede vir elke volksgroep in Suid-Afrika, het elke Suid-Afrikaner 'n bydrae om te lewer. Ook die Afrikaanse student as leier van môre mag nie sy verantwoordelikheid hierin probeer ontduik deur hom slegs te wil besig hou met sy studies, jool en studentepret nie."

Dit is juis die geval op die oomblik want Afrikaanse studentekoerante lewer nie juis daadwerklike bydrae tot die betrekking van studente tot deelname aan politieke en aktuele sake nie. Ek sonder "Die Matie" van Stellenbosch hier uit want in die uitgawe van 6 Mei is daar nie minder as nege berigte en briewe van 'n politieke of aktuele strekking nie.

Met so 'n kampuskoerant kan die student nie anders as om geprikkel te raak nie. Die verskillende koerante moet inisiatief neem en hul studente skool. Ek dink bv. aan "Campus Independent" van Wits wat myns insiens baanbrekerswerk in die verband doen.

Bogenoemde Engelse "studentekoerante" moet egter besef dat deur publikasies die ligte laat sien wat niks anders is as linkse politieke indoktrinasië nie, hul geen samewerking van Afrikaanse studente kan verwag nie.

Suid-Afrika se probleme kan net deur 'n verenigde blanke gemeenskap opgelos word. Deur hul optrede verhoed hulle juis die skepping van só 'n gemeenskap.

## Swart Nasionalisme is stimulerend vir Suid-Afrika

Dit is die standpunt van die twee PUK-dames wat op Saterdag 14 Mei die PUKKE by die tweede unteruniversitêre debatskompetisie verteenwoordig het. Die kompetisie is op die Tukkies-kampus gehou.

Mariëtta Kruger en Leenster Pasch het behoorlik bloed gesweet, maar moenie dink dit was verniet nie. Uit tien universiteite het hulle tweede geëindig. Hulle was nie alleen die enigste span wat net uit dames bestaan het nie, maar moes ook teen UPE 'n tweetalige universiteit kompeteer.

Deelname aan die debatskompetisie was beslis nie 'n grap nie. Mense soos Humphry Harrison, ondervoorsitter van Ikeys se Studenteraad is nie iemand wat sonder handskoene gepak kan word nie.

Hoewel die Maties met een punt gewen het, het de PUKKE die louere weggedra deur die beste individuele spreker te lewer, Mariëtta Kruger.

Die Retoriese Vereniging, wat die aksie vanaf die PUK-kampus gereël het, het nog baie planne vir 1977.

Die eerstejaars kan maar solank hulle vere regskud vir 'n vurige eerstejaarsdebat.

Verder kan die PUKKE maar hulle tande slyp vir 'n botsing met Kovyss tydens intervarsity. Alle PUKKE is welkom om ook die fynere kunsies van redevoering te kom leer.

## BESEMBOS KRY NUWE RED.

Die voorsitter van die Sentrale Studenteraad mnr. Eloff is aangewys as die redakteur van Die Besembos.

Mnr Zoks Schwellnus, voorsitter van die Kultuurraad het tydens die raad se vergadering verlede Woensdag gesê dat mnr. Eloff aangebied het om die redakteurspos te vul aangesien niemand na vore gekom het toe die pos vakant raak nie.

Hy het mnr. Eloff namens die Kultuurraad bedank vir sy bereidwilligheid, ten spyte van al sy ander bedrywighede, aldus mnr. Schwellnus.

## PERSKODE VIR UPEN

Na aanleiding van 'n berig "UPE a Bureaucratic ostrich" en die gedig "Harry we warn thee" berig die Upen, studentekoerant van UPE, in 'n voorblad artikel van 28 April dat hulle in samewerking met die Direkteur van Publikasies, Riel du Toit, 'n kode vir Upen opgestel het.

Die kode moes die taak en funksionering van Upen beskryf, maar ook sekere normatiewe elemente bevat.

Volgens die nuwe kode aanvaar die redakteur alle verantwoordelikheid vir wat in die koerant verskyn.

Volgens die Upen het dit hewige reaksie by die SR uitgelok omdat hulle wou hê dat die redakteur aan die SR verantwoordelik moet wees. Die SR kan wel enige redaksielid van sy pos onthef en kan aanbevelings doen dat die redakteur ontslaan moet word.

## PUKKE KOOP NIE HOEDE

Nadat die eerste besending Puk-hoedjies goed verkoop het, wil die tweede nie vinnig genoeg loop nie. Die eerste besending van duisend het R2 500 gekos. Hierdie hoedjies word, volgens Mnr I de V Lessing, die penningmeester van die SSR, teen kosprys aan die studente verkoop. Die hoedjies kos R2,50 stuk.

Aan die einde van 1976 is 'n tweede bestelling van duisend hoedjies geplaas. Op die huidige oomblik is net R600 se hoedjies verkoop. Die uitgawes met betrekking tot die hoedjies oorskry die inkomstes met R1 900.

Die hoedjies is by die penningmeesterskantoor van die SSR beskikbaar. Die kantoor is oop van 10h00 tot 16h00 (Maandag tot Donderdag) en van 10h00 tot 15h00 (Vrydag).

UIT  
NO.  
13

## RADIO PUK

Geagte Redakteur,

Radio Puk! Is dit noodsaaklik? Wat gaan dit die studente bied? Kan ons dit bekostig om in hierdie tyd van inflasie 'n radiosender op te rig van nagenoeg R1 500,00?

Dit klink alles baie mooi: "Jy kan Radio Puk opvang op jou eie radio ...", "Musiek oor die kampus tydens sleeptye ..." maar ons sukkel reeds so om ons stem oor studentevare te laat hoor - wat ons gratis kan doen. Musiek op die kampus is ook nie nodig nie; min studente is tydens sleeptyd op die kampus - gaan kyk self.

Buitendien sal dit ook net vir die studente moontlik wees om die uitsendings op te vang indien 'n ontvangstoestel aan die koshuis of gebou geïnstalleer is - wat nog 'n uitgawe beteken. Onthou daar is 5 gewone senders waarop ingeskakel kan word (met hope geleentheid vir versoeke).

Mense bevorder eerder deelname aan by. Studentevare en die Wapad.

Mede studente dink weer en dink mooi !!!

Helena, Wag-'n-Bietjie.

## HEELHARTIG AGTER SSR

Geagte Redakteur,

Ek dink dit het tyd geword dat iemand 'n slag die Puk student heelhartig agter die SSR staan. Die afgelope tyd sien ek in briewe in die Wapad dat die SSR kwaai deurloop onder negatiewe kritiek. Hier kan ek byvoorbeeld noem die saak van die skorsing van die Pukkies oor die opskop voorval.

Na my mening is dit enkelinge wat so negatief staan. Ek dink dat meeste Pukke tevrede is oor die optrede van die SSR. Dit is mos ons wat hulle gekies het en voordat ons hulle gekies het, het ons geweet in wie se hande ons die bestuur van studentevare op die kampus wil hê. Ons het die vertroue in hulle gehad dat hulle dit reg sou hanteer. Hulle het dit dan ook so gedoen.

Ons studeer aan 'n Christelike universiteit en daarom moet hulle en ons Pukke se optrede sodanig wees. Ons leuse is mos: "In U Lig". Dit het tyd geword dat ons as Pukke hulle bedank vir die werk wat hulle vir ons en die universiteit doen en hulle verseker van ons ondersteuning - Baie dankie.

## SINVOLLE DISKUSSIE

Geagte Redakteur,

Ek wil graag 'n saak aanroer wat ek hoop tot 'n sinvolle diskussie kan uitloop wat nie net tot briefwisseling beperk sal bly nie. Dit gaan oor die toekoms van ons land waarvoor ons self verantwoordelik is.

Ons as jongmense moet aan onself begin dink as die leiers van môre. Dit sê ek nie om status aan ons toe te ken nie, maar om die werk wat daar te doen is onder die aandag te bring. Dit is ons wat die deurslaggewende rol sal moet speel in die normalisering van die menseverhouding in Suid-Afrika. Ek dink dat dit die belangrikste taak van die toekoms is. Die politieke mag rus vandag op die Afrikaners en dit is hulle wat die inisiatief het. Dit is dus ons wat môre in die regeringsbanke sal gaan sit.

Ons moet nie net aan die toekoms dink as iets wat daar ver is en nie ons verantwoordelikheid is nie. Die toekoms begin nou al. Ons moet nou begin om aan die toekoms te werk. Ons moet 'n analise van ons situasie maak en beplan hoe Suid-Afrika môre daar sal uitsien. Die keuse wat ons egter net kon maak is tussen vreedsame saambestaan of geweld. As ons die eerste kies het ons nie meer die alleensê nie. Dan sal ons ons blanke alleensegenskap moet prygee. Ons sal dus nou moet begin werk om rasseverhoudings te verbeter en kontak met die ander volke uit te brei.

Voordat ons begin regmaak is daar 'n aantal dinge wat ons eers sal moet aanvaar en van waaruit ons sal moet dink. Hier volg net twee.

- Die blanke is 'n minderheid in die land en sal dit altyd wees. Ek glo nie daár hoef eens meer oor die moontlikheid van 'n blanke tuisland gepraat te word nie. Die Suid-Afrikaanse samelewing is te geïntegreerd om aan so 'n moontlikheid te dink.

- Omdat die blanke 'n minderheidsgroep is kan hy nie vir altyd kaas in die land wees nie. 'n Minderheidsgroep kan nie almal tevrede stel nie en dit is waarop die stabiliteit van 'n land rus.

Die toekoms is 'n toekoms van toenemende kontak en integrasie. Daar is egter 'n aantal dinge wat ons in onself sal moet regmaak en waarsonder geen kontak sal kan plaasvind nie. Een daarvan is blanke identiteit.

Al waar ons identiteit om draai is ons blanke vel en dit word as 'n groot openbare sonde beskou as iemand kontak probeer maak met anderskleuriges. Dit is 'n direkte bedreiging van ons identiteit. Die blanke het homself ook al toegespin in 'n kokon van wette. Die gevolg is dat hy die ander mense nie eers meer raaksien nie. As ons identiteit dan so kosbaar is en as dit dan so 'n heilsame uitwerking het soos ons almal vas glo, hoekom dra ons dit nie eerder uit nie. Hoekom maak ons nie dit aanvaarbaar aan ons mede Suid-Afrikaners nie. 'n Identiteit is nie iets wat ander mense van jou kom wegvat nie, dit hang net van jouself af wat daarmee gaan gebeur.

Ons behouding oor ons identiteit is een van die vele struikelblokke wat daar in die pad na beter mensverhoudings lê.

# KOSHUISNUUS

## Oosterhof hou fees

Na elf lange jare wat gepaard gegaan het met moeitevolle stryd het ons uiteindelik dit gekry - splinternuwe gordyne en meubels.



Sleepbanke ingewy. Huisma met sambreel hou toesig.  
(Foto fotokuns).

## WAG-'N-BIETJIE en die akademie

Die Wag-'n-Bietjie-dames verkeer deesdae in 'n akademiese stemming. Die uittekenboek vir die biblioteek is gereeld vol haastige handtekeninge. Ons laat ons egter nie ondersit deur sulke nietighede soos akademie nie, en geniet ons veral Saterdag op die sportgebied.

Kragte is al met verskeie koshuise gemeet en die hokkiespan van die koshuise vaar baie goed hierdie jaar. Saterdag het hulle teen Wanda en Kasteel gespeel en Wanda het naelskraap met 1 doel teenoor 0 gewen. Wag-'n Bietjie se dames sien egter enige tyd kans om weer teen hulle te speel. Kasteel en Wag-'n-Bietjie skyn egter ewe sterk te wees, en die wedstryd eindig gelykop met geen doele nie.

Verder is die netbaldames baie in hulle skik met hulle oorwinning teen die dames van Heide. Na die wedstryd (wat deur een van die dames as een van bloed, sweet en tranes beskryf is) tree Wag-'n-Bietjie as oorwinnaar uit die stryd met 'n telling van 10 punte teenoor Heide se 8. Daar moet onthou word dat Heide verlede jaar die weners van die koshuisliga in netbal was.

Verlede Maandagaand se koshuisvergadering het baie

interessant verloop. Daar is besluit om die boonste ontspanningsaal saans tydens sleeptyd oop te stel. Daar word egter nog finaal besluit oor die spesifieke tyd wat die manne ons ontspanningsaal mag besoek. Vir die manne wat by die dames van Wag-'n-Bietjie sleep, kan ons verseker dat dit aangenaam sal wees.

Die boonste ontspanningsaal is toegerus met 'n volvloer tapyt, 'n antrasietstofie, sowel as 'n hoëtroustel. Dit wil voorkom asof daar in die winter sommer lekker gekuier gaan word.

Verder wil ons net aan die manne wat af en toe kom sê, dat ons hulle ongelukkig nie mag innooi vir koffie nie. Daar kan egter onthou word, soos een van die huiskomiteedele tydens die vergadering opgemerk het, dat ons darem vensters het! Of dit nou grapsgewys was, sal ons nie weet nie.

Elf jaar se wag - dit verdien mos 'n fees of hoe? 'n Feesmoeder in die figuur van Henriëtte is aangewys en sy en haar susters in die koesisterentent het gesorg dat ons 'n "ware Afrikaner"-fees beleef.

Vroegweke is daar gewerskaf, uitnodigings is uitgestuur en hangkaste van bo na onder uitgepak op soek na 'n geskikte uitrusting vir "dië" geleentheid.

Donderdagaand was alles in feesgewaad getooi. Akademie was tydelik vergete - die fees was die belangrikste. Die sitkamer, die objek van feesviering, was getooi soos nog nooit. Die eregaste het een vir een opgedaag. Eers het Prof. Schalk (huispa) opgedaag, toe Mnr Fick (van koshuisfrustrasie wat 11 lange jare die klagtes moes aanhoor) en dan natuurlik oom Piet Kiekies om die geleentheid te verenig.

Ander gaste wat veral die oog getref het was o.a. Voortrekkerdame (Anelia) wat kaalvoet oor die Drakensberge moes trek, die drie daöder yt die kap - Anna, Frieda en Magda, Mary Poppins (Tannie huisma Anna-tjie) en die vermaarde Prinses Hendrieka uit Uganda.

Na 'n stigtelike woord deur die Huispa, het mnr Fick sy spyt oor die elf jaar lange wag uitgespreek, en is die ameublement amptelik in gebruik geneem. Kameralfitse, persmanne en geklingel van glase was aan die orde van die dag.

Die noenmaal in die eet-saal was verruklik. 'n Opregte woord van dank aan spyseniers vir die dae lange werkskaffing daaraan. Feesgewaad van die tafels was grootliks toegeskryf aan die kerse en die kosmosblomme.

## VERGEET MY NIE

BESOEKERS aan "Vergeet-my-nie" het seker al gemerk dat die pragtige ornamentale oranje kruuiwa voor ons deur, sedert karnavaltyd weg is.

Die Speurdiens van Vergeet-my-nie het orals gesoek, elke leidraad opgevolg en vingerafdrukke geneem; en ten einde laaste - na letterlik maande van navorsing - is die skuldige aan die man gebring: niemand anders as Overs nie.

Die speurdiens het al sy troepe en reserviste, wat reeds vir so lank gereed gestaan het, opgekommandeer en die vyandelike kamp bestorm. Daar was 'n bietjie handgemeen geraak maar uit pure bewondering vir die dapper vegters en die speurendes, het Over-de-Voor ons kruuiwa terugbesorg; vol heerlike sappige, smaaklike, soet suigstokkies!

Aan al die Overs-manne, omdat hulle ons kruuiwa so mooi opgepas het en omdat hulle dit op eg ridderlike wyse terugbesorg het, sê Vergeet-my-nie vele dank en julle is baie oulik en "we dig you the most."

Intervarsity, wegspring van die 10 000 meter op Rooodeplaatdam.

Foto: Jaco Pretorius.



## KANO-INTERVARSITY OP RHOODEPLAATDAM

Die eerste volwaardige kano-intervarsity tussen Puk, Tuks, Rau en Wits is Saterdag 14 Mei deur Tuks op die Rhoodeplaatdam aangebied.

Dit was 'n groot sukses aangesien die verskeie universiteite vir die eerste keer op so 'n wyse met mekaar kon meeding. Die volledige uitslae is soos volg:

| Item                      | Plek.   |
|---------------------------|---|
| 1. Senior 1 000 m K1      | 1. Puk, 2. Rau, 3. Wits, 4. Tuks, 5. Rau, 6. Wits.                                    |
| 2. Dames 1 000m K2        | 1. Tuks, 2. Puk.  |
| 3. Junior 500m K1         | 1. Rau, 2. Tuks, 3. Puk, 4. Puk, 5. Tuks, 6. Puk.                                     |
| 4. Senior 500m K1         | 1. Puk, 2. Tuks, 3. Tuks, 4. Puk, 5. Wits, 6. Rau.                                    |
| 5. Dames 500m K2          | 1. Tuks, 2. Puk, 3. Puk/Rau, 4. Puk, 5. Tuks.   |
| 6. Ope 1 000m K1          | 1. Puk, 2. Tuks, 3. Wits, 4. Rau, 5. Puk, 6. Wits, 7. Tuks, 8. Puk, 9. Puk, 10. Tuks. |
| 7. Gemengde 1 000m K2     | 1. Tuks, 2. Puk, 3. Tuks, 4. Tuks, 5. Tuks, 6. Puk.                                   |
| 8. Senior 1 000m K2       | 1. Tuks, 2. Puk, 3. Rau, 4. Wits, 5. Tuks, 6. Tuks.                                   |
| 9. Dames 500m K1          | 1. Tuks, 2. Puk, 3. Tuks, 4. Puk, 5. Puk, 6. Puk.                                     |
| 10. Senior 4x500 aflos K1 | 1. Tuks, 2. Puk, 3. Rau, 4. Tuks, 5. Wits, 6. Tuks, 7. Puk, 8. Rau, 9. Puk, 10. Puk.  |
| 11. Dames aflos 4x250 K1  | Geen punt want Tuks en Puk se spanne het omgeval.                                     |
| 12. Ope 10 000m K1        | Tuks 30, Puk 19, Wits 14, Rau 11.   |

Die eindtotaal was soos volg:

Tuks 126  
Puk 107  
Rau 41  
Wits 38

Saal de Jager van Puk het die Victor Ludorum-beker verower omdat hy as individu die meeste punte vir sy span ingesamel het naamlik 35½. Chris Greeff van Tuks was tweede met 31 punte.

Na afloop van die kompetisie het daar 'n bier en braai en dans plaasgevind wat teleurstellend swak bygewoon is. Meeste van die deelnemers en ondersteuners het vroeg alreeds vertrek.

Reklame vir intervarsity was puik. Tukkie se kanoklub moet ook geluk gewens word vir hul inisiatief om die intervarsity aan te bied.

## WAT 'N HEERLIKE DAG VIR UITSPAN EN VERGEET-MY-NIE

Alla wêreld! Sulke mooi jong dames besoek die Koninkryk van die Rooi Beer nie elke dag nie!

Deur die hele Ryk van ons geliefde Rooi Beer gons dit soos die ander "bere" die koms van Vergeet-my-Nie se dames bespreek. Die "wolley-bal"-baan word in gereedheid gebring, want die dames van Vergeet-my-Nie kan teen ons speel! Wat 'n heerlijkheid! Eers 'n bietjie afrigtingswerk en dan takel ons mekaar. Geesdriftig word die dames aangemoedig. En hulle speel soos ware kampioene! Maar o wee! die Rooi Beer is darem te sterk!

Vinnig leer die dames egter fynere kunsies aan en toe moes jy hulle sien! Veral toe Fanie soos 'n ervare heer aan die dames se kant inspring en

hulle help. Hy lei sy span tot 'n welverdiende oorwinning! Staande word hulle toegejuig deur man en muis! Toe kom die weerwraak. Vergeet-my-Nie se eerste span wat so pas teen die tweedes onder Fanie se "leiding" verloor het, klim met mening in. Die resultaat? 'n Reuse oorwinning vir die eerste span!

Nou-ja, so verstewig die Rooi Beer sy betrekkinge met die ander koshuise. Ons hoop om in die toekomstige bande wat reeds gesmee is, te verstewig.

Met vriendelike Beer-groete.

11-15 Jul '77

# Kuesta

kuns en fiesta

kuns en fiesta

kuns en fiesta

kuns en fiesta

kuns en fiesta

# PASV GESONDHEIDSWEEK WAS GESLAAGD

Die PASV het gedurende die week 28 tot 31 Maart 'n gesondheidsweek aangebied. Een van die onderwerpe wat behandel is, is of genesing sielkundig kan wees of nie. Dr. Doevendans het uit die Suid-Afrikaanse Mediese Joernaal van Maart 1977 daarop gewys dat slegs akkute infeksies deur geneesmiddels bestry kan word.

Prof. Hary Seftel, van die mediese skool te Wits het ernstige siektes soos hartaanvalle behandel. Volgens hom sterf jaarliks 1-miljoen mense aan hartaanvalle.



Brenda van Alexander de Markoff vertel meer omtrent skoonheid.

Vetsug is net so ernstige siekte, dat wanneer 'n mens se liggaamsmassa 25% te groot is, jou kans vir diabetes agtmaal vererger. Dr. Sash het daarop gewys dat 'n dieet 'n hoë proteïeninhoud moet hê. Oefening volgens hom is net so belangrik.

Kanker wat hoofsaaklik deur chemikalië veroorsaak word, is ook omgewingsgebonden. In Engeland gaan daar jaarliks 50 000 rokers aan hartaanvalle dood. Alkohol is die derde hoogste oorsaak van dood. Dit vermink mense liggaamlik, geestelik en maatskaplik.

Gedurende die gesondheidsweek is daar ook werke deur Brenda van Alexander de Markoff oor skoonheid gegee. Die vel moet soggens en saans goed skoongemaak word en afgespoel word met lou water. Reinigingsmelk moet ook nie te veel alkohol bevat nie, want dit los die olierige laag op. As jy slegs een produk kan koop is nagroom die beste.



Foto: Fotokuns

## BEKENDE PUKKE WENNERS VAN COKE-BEURSE

TWEE NAGRAADSE studente aan die PU vir CHO het vanjaar vyfhonderd Rand beurse van die Coca Cola Bottelaars Vereniging verower. Hulle is Dries Coetzer, bekende rugbyspeler van die Puk wat 'n M. Comm-student is, en Tommie Ferreira, wat met gevorderde musiek studie besig is. Hy is ook 'n kranige atleet.

Die beurse is op 28 April oorhandig deur mnr. De Klerk van Coca Cola en mnr. Nel van Suncrush in Klerksdorp, wat heel regs op die foto verskyn saam met (v.l.n.r.) mnr. Coetzer, Ferreira en Hans van Zyl, Rekenmeester van die PU.

## KAFETERIA

### PLATSAK

OM DIE kafeteria later ure oop te hou word studente (veral dames) benodig om uit te help.

Die ure sal wees vanaf 18h00 tot 12h00.

Vergoeding onderhandelbaar.

Vir verdere besonderhede kontak mnr. T. Eloff by die SSR-kantoor tussen 13h30 tot 14h00.

## KAFETERIA WORD VERBETER

Die Puk-Pik gaan voor die einde van hierdie maand sitplek vir baie meer studente hê.

Volgens die rektor prof. Tjaart van der Walt het dit lankal nodig geword om die Puk-Pik te verbeter omdat dit nie aan die Universiteit se behoeftes voldoen nie.

Veranderings wat aangebring gaan word sluit onder meer in nuwe tafels en stoele buite, asook 'n selfbedieningstelsel, beter etes, 'n nuwe bestuur en buitebediening.

Die belangrikste veranderings sal oor 'n tydperk van twee maande strek. Die tafels en stoele buite is reeds bestel en sal moontlik voor die einde van Meimaand gebruik kan word.

Daar sal moontlik werkgeleenthede vir studente in die kafeteria wees omdat dit vir langer ure oop sal bly. Die spesifieke tye is nog nie vasgestel nie.

## KUESTA '77

Kuesta '77 vind van 11-15 Julie op ons kampus plaas. Kursusse in valskermspring, motorherstelkunde, fotografie en redenaarskursus vorm deel van 'n week vol plesier.

Daar is ook 'n kunsfees waar foto's beoordeel sal word. Die aspirant toneelspelers kan hul slag kom wys en so ook studente sangers.

Daar is ook sosiale aksies soos 'n osbraai, "brewers brunch" (bier en brood) en 'n dinee.

Meer inligting is by die SSR-kantoor verkrygbaar.

## ONS WAG OP KLEREDRAGREËLS

Die Pukke sal waarskynlik op 8 Junie uitsluitel kry oor die sprake dat nuwe kleredragreëls ingestel word.

Die SSR se kleredragkomitee het reeds hul voorgestelde reëls aan die Senaat se kleredragkomitee voorgelê. Laasgenoemde het die reëls gereed gekry vir voorlegging aan die Senaat.

Die deurvoering van die reëls word egter vertraag omdat daar gevoel word dat uniforme koshuisreëls saam met die voorgestelde reëls vir klere opgestel moet word.

Huisvaders van die verskillende koshuise is reeds besig met die opstelling van die nuwe koshuisreëls.

Die Wapad het uit ingeligte bronne verneem dat die SSR se kleredragkomitee, wat bestaan uit: mnr. Theo Cloete, Div Lessing, Johan van Wyk, Pieter Odendaal en Manie Meyer asook mej. Wilna Fondse, Julieta Barnard en Ilse Kuun, die SSR se damesvertegenwoordig-

ster, met die huisvaders sal skakel.

Al die reëls sal dan saam

op die volgende Senaatsvergadering op 8 Junie voorgelê word.

## SKAAKPOTENSIAAL IS GOED

Die skaakklub het hul eerste ledevergadering op 28 Februarie gehou.

Bedrywig is hulle nie juis op die oomblik nie, omdat die ligawedstryde eers teen die middel van Junie sal begin. Op die oomblik loop 'n eerstejaar, Gerhard Swane-poel, met die klub-kampioenskappe voor. Wie die uiteindelijke wenners gaan wees is op die oomblik nog onbepaalbaar. Spelers soos

Johan Swanepoel, Jannie Langenhoven en Wynand van Niekirk moet nie buite rekening gelaat word nie.

Die klub het ook 'n paar dames wat vanjaar deelneem. Tot dusver dreun hulle die mans goed op en menige man het al die onderspit gedelf.

Nuwe spelers is welkom om by die klub aan te sluit. Oefentye is Maandagaande vanaf 19h30 en Woensdaemiddae om 16h10 in kamer 10 van die F. du Toit gebou.

## Volkskas praat die taal van kundiges

Die taal wat Volkskas praat, val soos klinkende munt op die oor van die vernuftige belegger.

Volkskas kan bekostig om soos 'n kenner sy sê te sê: want sedert die vroegste dae groei Volkskas saam met die land en sy mense. Ken hy hulle aard, hulle behoeftes, hulle loyaliteite.

Daarom praat Volkskas saam . . . in 'n tradisie van diens en kundigheid.

Kom praat met die bank wat verstaan.



(Gereguleerde Handelsbank)

## NAWEEKTOETSE KORTWIEK KORPS

Korps se werksaamhede word kwaai gekortwiek deur naweektoetse sê mnr. Piet Fourie en Douw Breedt in hul halfjaarlikse verslag.

Die tweedejaarskamp was egter baie geslaagd.

Die beplande Inter-universitêre kamp vir Christelike studenteverenigings word ernstig deur die naweektoetse geraak asook die P.U.-Aktueel eerstejaarskampe.

Wat die interuniversitêre kamp betref is daar goeie kontak met ander universiteite gemaak.

Die grootste probleme

wat, behalwe naweektoetse, met die kampe ondervind word is die gebrek aan samehang en kontinuiteit in die opleiding self. Reklame is soms ook baie swak.

Volgens die verslag sal die eerstejaarskamp nog deurgaang terwyl nog 'n sel-kamp beplan word.

Gedurende die tweede semester sal 'n kamp vir Universiteitsverlaters moontlik gehou word.

## Hoërskool John Vorster soek oudleerlinge

DIE Hoërskool John Vorster op Nigel wil baie graag in aanraking kom met soveel as moontlik van sy oud-skoliere. Hulle moet die skool so gou as moontlik kontak en van hulle name en adresse voorsien.

Die adres is:  
Hoërskool John Vorster  
Posbus 36  
Nigel  
1490

## SPEZIALE STUDENTEPRYSE

MAISON HAZELETTE  
OWENSLAAN 4  
(REGOOR CHECKERS)

VRA VIR ANTONIO

LAAT 'N KENNER U HARE SNY

|                  |                 |
|------------------|-----------------|
| HAARSNY          | R 2-50          |
| SNY & BLAASDROOG | R 4-50 - R 5-50 |
| KARTELLINGS      | R10-00 - R12-50 |
| „HIGHLIGHT“      | R 8-00 - R11-00 |

BESTELLINGS: TEL. 5570  
MANS OOK WELKOM

## KOSHUISRUGBY

# SLEGS HOMBRÉ ONOORWONNE

MET 'N KWART van die koshuisliga wedstryde reeds afgehandel is dit slegs Hombré wat nog onoorwonne is. Afgesien hiervan is dit geen uitgemaakte saak dat hulle die kompetisie sal wen nie, want Dawie du Plessis blaas in hulle nekke met slegs een wedstryd verloor, so ook Klooster. Saterdag die 14 Mei 1977 is die volgende wedstryde gespeel:

Dawie du Plessis - 15  
Klooster - 9

Dawie du Plessis kry hier vroeg 'n oorhand wat die fondament geplaas het vir hulle oorwinning. Klooster verloor dus hulle eerste wedstryd van die seisoen en sal definitief 'n plan met hulle senters moet maak as hulle bo wil uitkom in die liga.

Caput - 17  
Drakenstein - 10

Caput behaal sy eerste wedstryd van die seisoen in 'n wedstryd wat met tye goeie rugby opgelewer het. Drakenstein wat goed begin het die seisoen is egter besig om teleurstellende rugby te speel.

Overs - 24 Dorp - 12

Verlede jaar se kompirene

7 Mei 1977:

Hombré - 12  
Dawie Dup - 14  
Dorp - 29

14 Mei 1977:

Klooster - 16  
Hombré - 9  
Dawie Dup wen Dorp

Die huidige puntestand is:

| Koshuis     | Aantal wedstryde | Punte |
|-------------|------------------|-------|
| Hombré      | 3                | 6     |
| Dawie Dup   | 4                | 6     |
| Klooster    | 3                | 4     |
| Caput       | 3                | 2     |
| Overs       | 3                | 2     |
| Drakenstein | 3                | 2     |
| Dorp        | 4                | 2     |

Overs slaap egter eers om in hulle derde wedstryd die seisoen om 'n oorwinning te behaal. Dorp het egter nie aan die verwagtinge voldoen nie, wat van hulle verwag was na hulle skitterende oorwinning van 29 - 3 oor Drakenstein die vorige Saterdag nie. Ander uitslae die seisoen is:

Overs - 8  
Caput - 6  
Drakenstein - 3

Caput - 15  
Drakenstein - 6



Theo Diedericks skrumskakel van Hombré stuur sy agterlyn weg in 'n wedstryd teen Overs wat deur Hombré 12-8 gewen is.

Foto: G. van Rooyen.

## NETBAL OF KOFFIE?

Koshuisnetbalvertegenwoordigers hardloop net heen-en-weer om dames te kry vir hulle koshuisspanne. Die spanne is gedurig volledig maar Saterdag op die Netbalbaan is daar werklik min spanne wat werklik kan speel.

Die Pukdames is nie bereid om elke tweede Saterdag op te offer vir hul koshuise nie. Vir die wat dit wel doen, baie dankie van alle Pukke.

Die kern van die probleem blyk te wees dié gesindheid waarmee die dames wil speel. Hulle speel nie vir die spel as sulks nie. Niemand wil die oefening bybring nie - altyd verskonings en nogmaals verskonings.

Baie dames verkies liewer hulle koshuis kamers met 'n lekker koppie koffie in die hand en dan ... hoe sal ons nou sê, "die gebeure van die dag"!

'n Goeie vraag wat die Pukdames hulle self kan afvra is: "Kort ons Pukdames nie dalk meer oefening nie? - oefening is tog die beste dieet! Lywigheid neem mos toe deesdae.

## Dameshokkiespanne het getoer

Met 'n suksesvolle fondsinsameling het 'n toer vir dié dames 'n werklikheid geword. Dit het plaasgevind vanaf 25 April - 2 Mei 1977 wat bestaan het uit 26 lede in die toergroep, 2 toerouers, 'n bestuurder vir die 2½ ton en 23 speelsters.

Die speelsters was tydens die hele toer op Lekkerood in Oos-Tvl tuis. Dinsdag 26 April klop Pukspan Hamilton Wanders met 1-0. Woensdag 27 April het eerstespan Clarendon Girls High School 1-0 gewen. Die tweedespan het teen Arens Hoërskool 2-2 gelykop gespeel. Donderdag 28 April wen tweedespan met 5-1 teen Convent. Eerstespan verloor

teen King Williamstown met 2-1. Vrydag 29 April. Eerstespan verloor teen "Old Boys" met 5-2 asook tweedespan 1-3 teen Buffaloes.

Dié toer was 'n reuse sukses en is afgesluit met 'n dinie vir al twee spanne as gaste van die Potchefstroomse Burgemeester Dr. G.J.J. van Deventer by die Kenneway Hotel in Oos-Londen.

### SPORTPERSOONLIKHEID VAN DIE WEEK

## FLIPPPIE VENTER

Die rugbyspeler op die PUK wat die afgelope twee jaar die meeste opgang gemaak het is ongetwyfeld Flip Venter, die PUK 1A skrumskakel.

Flippie, wat in sy finale jaar H.O.D. is, het eers in sy voorlaaste jaar verteenwoordigende rugby begin speel. In sy eerste paar jaar het hy maar vir sy KOSHUIS UITGEDRAF. In dié tydperk het hy egter vir die PUK gestoei. Op skool het hy ook Noord-Natal op die stoeimatte verteenwoordig.

Verlede jaar het Flip vir die PUK se eerstespan rugby begin speel en Wes Tvl "B" in een wedstryd verteenwoordig. Hierdie jaar het hy egter sy stem van die begin af dik gemaak, en is op die oomblik 'n outomatiese keuse vir Wes Tvl.

Flip kan met sy ondernemende spel dit nog verbring. Hy is op die oomblik

een van die beste skrumskakels in die land. Oefening is Flippie se

sleutel tot sukses, alhoewel hy 'n baie natuurlike sportman is.



Flippie Venter  
Foto: G. van Rooyen

## Pluimbalkklub puik

Drie Pukke, Leon Wolmarans, Linnie Uys en Rosalie de Klerk, is gekies vir die Wes-Transvaalse A-span.

In die W.Tvl. ligawedstryd was die PUKKE een van die gedugste spanne.

Tydens Intervarsity teen RAU het die tweede span 15-0 gewen, terwyl die gekombineerde A span (dames en mans) met 9-6 geseëvier het.

Die sukses van die Pluimbalkklub kan hoofsaaklik toegeskryf word aan die daad-

werklike steun van die sport instituut, waardeur dit moontlik is om afrigting van baie hoë standaard te verkry. Die toegewyde oefening van veral die topspelers moet ook nie buite rekening gelaat word nie. Met mnr. Sakkie Robinson as voorsitter, sal die PU Pluimbalkklub groot hoogtes bereik.

KOSTER EN KOK  
HOMBRÉ

## SPORTKORRELS DEUR HANS SAESTAD

# LANDLOOP INISIATIEF GESMOOR?

Met die huidige ekonomiese toestand in die land kan Universiteite nie meer bekostig om sportmanne van ander universiteite vry losies te gee nie.

Dit bring mee dat elke student wat aan 'n S.A.U. toernooi deelneem sy verblyfskoste uit sy eie sak moet betaal. Die tarief wat die Universiteite vra is R5,50 per dag.

Die landloopklub het egter besluit om geld in te samel vir hulle S.A.U. op P.E. 'n Os is aan hulle geskenk, en dit sou gebruik word om geld in te samel, deur dit aan die wenner te gee wat 'n kompetisie wen.

Die SSR het egter besluit dat dit nie goed is nie, want uit die korrekte antwoorde sou een naam getrek word.

Volgens die SSR speel geluk 'n rol, en dit kom neer op lotery, en die landloopklub kry 'n ferm nee vir die kompetisie!

As alternatief word aanbeveel 'n veiling. Dit is mooi om 'n alternatief te stel, maar onprakties. Vir 'n os op 'n veiling kry jy om en by R200. Dit dek slegs 5 persone se koste en met studente by 'n veiling sal jy skaars R100 kry.

Nee, SSR, dink bietjie na, en het julle nie inisiatief om finansiële probleme te houe te kom gedwarsboom nie???

ONS HET ALLES WAARNA U SOEK IN  
DIE LYN VAN SPORTBENODIGD-  
HEDE; BESOEK ONS GERUS

STUDENTE  
SPORT

Kerkstraat  
Potchefstroom